

人境廬詩草



嘉應黃先生墓誌銘

新會梁啓超撰

國家自甲午喪師以後勢益不競謀國者尙泄泄未知
改圖獨

德宗皇帝大奮神斷明 詔天下改變百度而是時各
行省大吏奉行 詔書最力者惟湖南巡撫義甯陳公
寶箴而相與助其成者則嘉應黃先生公度也先生時
方以湖南鹽法道署理按察使與陳公戮力殫精朝設
而夕施綱舉而目張而其尤爲先生精心所措注者則
曰保衛局保衛局者略仿外國警察之制而凡與民利
民瘼相麗爲一方民力所能自舉者悉統焉擇其鄉邑
之望分任之而吏董其成布之初民頗疑賊後乃大
驩先生方欲推布一切呂圖久遠而朝局變黨禍起先
生與陳公得罪而去而天下事益不可爲嗟乎古有以

一人之用舍係一國之興亡者觀於先生其信之矣先生諱遵憲世爲嘉應州人曾祖諱學詩祖諱際昇父諱鴻藻官廣西知府皆以先生貴封贈榮祿大夫先生以拔貢生中式光緒二年順天鄉試舉人旋隨使日本歷官四十年有大小久暫之不同而皆舉其職當爲日本使館參贊也日本方縣我琉球且覲及朝鮮先生告使者乘彼謀未定先發制之具牘數千言陳利害甚悉東人至今誦之而當事不省不二十年一屬遂相繼不保又爲英之新嘉坡美之舊金山總領事矣美人嫉吾民之僑彼境者蓄志擯之先生旣以先事禦之之謀告其上而不用乃盡其力所能及以爲捍衛美政府嘗藉口衛生係吾民數千先生數語捍闔而脫之且責償焉吾嘗遊美洲去先生爲領事時且二十餘年矣而吾民尙

稱道此事不容口先生居外國久於其上下情形內外形勢洞幽察隱故凡有所應付莫不迎刃而解而大吏亦稍稍知先生能外交故每以事相屬江鄂四省教案積數十起連十數年文牘盈尺莫能斷結及先生受委則浹月而決之教士擣舌而不敢爭異時沿江沿海劃地爲市租借外旅命曰租界始事者昧於國際法於界內畀以治外法權喪威失權悔不可追先生恫之值甲午之役約以蘇州杭州兩處爲租界予日本授受之際先生適主其事乃曰蘇杭腹地非江海口岸比因議自營市政凡所以便外旅者纖悉備至而獨於治外法權則靳焉日本主者莫能難也殆畫諾矣適有以蜚語相中者謂先生受外賂爲它人計便安約遂廢而日本亦撤其使歸兩國同以此事謹其使而天下萬國則謂曰

本之舉爲計獨得也先生雖以外交知名當世然受兩使命皆中沮光緒二十一年奉旨入覲以道員帶卿銜授出使大臣駐德國時德人方圖膠州憚先生來折其機牙迺設詞以撼我政府卒尼其行光緒二十四年復以三品京堂候補充出使日本大臣時先生方解湖南按察使任養疾上海淹留未行而黨禍卒起緹騎繞先生室者兩日幾受羅織事雖得白使事亦解先生遂歸田里光緒三十一年二月二十三日以疾卒於家嗚呼以先生之明於識練於事忠於國使稍得藉手其所措施豈可限量而乃使之浮沈於羣吏之間者且數十年晚遭際會似可稍展其所蘊矣而事變忽起所志不終遂且乃憂讒畏譏流離失職而死此豈天之所爲耶先生讀書有精識遠見不囿於古不徇於今嘗思成

一家言曰演孔篇未成而所成之日本國志四十卷當吾國二十年以前羣未知日本之可畏而先生此書則已言日本維新之效成則且霸而首先受其衝者爲吾中國及後而先生之言盡驗以是人尤服其先見先生爲文章務取暢達不苟爲夸飾至其爲詩則精思渺慮盤礴而莫測其際平生所作逾千首自裒集得六百餘首曰入境廬詩草自其少年稽古學道以及中年閱歷世事暨國內外名山水與其風俗政治形勢土物至於放廢而後憂時感事悲憤伊鬱之情悉託之於詩故先生之詩陽開陰闢千變萬化不可端倪於古詩人中獨具境界先生娶葉氏誥封夫人子四人曰冕曰鼎崇曰履剛曰璇泰履剛早殤女子二適鍾適梁先生之卒也冕方隨節日本奔喪歸旋以毀卒 今上皇帝紀元之

三月鼎崇璇泰始奉其喪葬於海南黃居坪之原先生之從弟曰遵庚以狀請銘且曰先兄志也啓超以弱齡得侍先生惟道惟義以誨以教獲罪而後交親相棄亦惟先生咻噢振厲拳拳懇懇有同疇昔先生前卒之一歲詒書啓超曰國中知君者無若我知我者無若君然則啓超雖不文又安敢辭銘曰

士失職者多矣而獨於斯人焉奚悲悲其一身之進退死生與一國之榮悴兮相依謂天不欲平治天下曷爲篤生此才槃魄而權奇謂天欲平治天下曷爲挫鑠窘辱拂亂之不已又中道而奪之其所志所學蟠天際地會不得以百一自見於時若夫事業文章之在人耳目者則乃其平生之所不屑爲然且舉九州之駿足十駕焉而莫之能追則夫其所旁薄鬱積而未發者又安得

而測知而今也悉隨其形神精魄灰化蛻委萬劫不復
而永闕於茲白日墜兮露滋楊蕭蕭兮蔓離離九原不
作兮吾道誰與歸儀型先民兮視此辭

入境廬詩草目錄

嘉應黃遵憲公度

卷一 古今體詩共七十二首

感懷

乙丑十一月避亂大埔三河虛

拔自賊中述所聞

潮州行

喜聞恪靖伯左公至官軍收復嘉應賊盡滅

亂後歸家

送女弟

二十初度

游豐湖

長子履端生

雜感

哭張心谷士駒三首

山歌

生女

庚午六月重到豐湖誌感

游潘園感賦

香港感懷十首

寓汕頭旅館感懷寄梁詩五居寶

將至潮州又寄詩五

鐵漢樓歌

和周朗山琨見贈之作

寄和周朗山

春夜懷蕭蘭谷光泰

聞詩五婦病甚

懷詩五

爲詩五悼亡作

庚午中秋夜始識羅少珊文仲於矮屋中遂偕詩
五共登明遠樓看月少珊有詩作此追和時癸

酉孟秋也

羊城感賦六首

卷二 古今體詩共五十五首

寄四弟

入境廬雜詩

將應廷試感懷

出門

由輪舟抵天津作

水濱

武清道中作

早行

慷慨

月夜

代東寄詩五蘭谷並問諸友

狂歌示胡二曉岑曠

重九日雨獨遊醉中作

別賴雲芝同年鶴年

爲蕭少尉步青作

烏之珠歌

田橫島

和鍾西耘庶常德祥津門感懷詩

福州大水行同張樵野丈蔭桓龔霽人文易圖作
將應順天試仍用前韻呈霽人樵野丈

述懷再呈霽人樵野丈

大獄四首

別張簡唐思敬並示陳宰尙元焯

三十初度

將之日本題半身寫真寄諸友

又寄內子

卷三 古今體詩共四十八首

由上海啓行至長崎

西鄉星歌

石川鵠齋英偕僧來謁張副使誤謂爲僧鵠齋作

詩自辯余賦此以解嘲

不忍池晚遊詩

宮本鳴北以舊題長華園詩索和

櫻花歌

陸軍官學校開校禮成賦呈有栖川熾仁親王

都踊歌

庚辰四月重野成齋安禪岩谷六一條日下部東

作鳴鶴蒲生綱齋重章岡鹿門千仞諸君子約

遊後樂園園卽源光國舊藩邸感而賦此

送尖戶璣公使之燕京

大阪

游箱根

宮本鳴北索題晃山圖卽用卷中小野湖山詩韻

近世愛國志士歌

赤穗四十七義士歌

罷美國留學生感賦

徐晉齋觀察壽朋吳翰濤貳尹廣霽隨使美洲道

出日本余飲之金壽樓翰濤卽席有詩和韻以

贈

流求歌

卷四 古今體詩共三十二首

奉 命爲美國三富蘭西士果總領事留別日本

諸君子

爲佐野雪津常民題觚亭

海行雜感

逐客篇

紀事

馮將軍歌

九姓漁船曲

感懷

卷五 古今體詩共二十七首

八月十五夜太平洋舟中望月作歌

歸過日本誌感

舟中驟雨

到香港

到廣州

肇慶舟中

將至梧州誌痛

游七星巖

夜宿潮州城下

夜泊

遠歸

鄉人以余遠歸爭來詢問賦此誌感

今夕

春夜招鄉人飲

小女

卽事

下水船歌

閉關

春暮偶游歸飲入境廬

拜會祖母李太夫人墓

遣悶

寒食

夜飲

日本國志書成誌感

十月十九日至滬初隨何大臣如璋使日本卽於是日由上海東渡今十二年矣

由潮州泝流而上駛風舟行甚疾

夜泊高陂其地多竹

卷六 古今體詩共六十九首

自香港登舟感懷

過安南西貢有感

錫蘭島臥佛

溫則宮朝會

重霧

倫敦大霧行

在倫敦寫真誌感

得梁詩五書

今別離

憶胡曉岑

感事三首

寄懷左子興領事秉隆

送承伯純厚吏部東歸

歲暮懷人詩

春遊詞

鬱鬱

登巴黎鐵塔

蘇彝士河

九月十一夜渡蘇彝士河

舟泊波塞是夕大雨蓋六月不雨矣

卷七 古今體詩共五十首

夜登近海樓

續懷人詩

新嘉坡雜詩十二首

以蓮菊桃雜供一瓶作歌

眼前

寓章園養疴

番客篇

養疴雜詩

卷八 古今體詩共五十七首

悲平壤

東溝行

哀旅順

哭威海

偕葉損軒大莊夜談

乙未二月二十七日公祭沈文肅公祠

爲同年吳德瀟壽其母夫人

馬關紀事

晚渡江

降將軍歌

五月十三夜江行望月

臺灣行

度遼將軍歌

閏月飲集鍾山送文芸閣學士廷式假歸兼懷陳

伯嚴吏部三立

用寫經齋體送葉損軒之申江

立秋日訪易實甫順鼎遂偕游秦淮和實甫作

又和實甫

元武湖歌和龍松岑 繼棟

九月初三夜招袁重黎柯巽庵梁節庵王晉卿諸

君小飲和節庵韻

上海喜晤陳伯嚴

題黃佐廷贈尉遺像

贈梁任父同年

寄女

感懷呈樵野尙書文卽用話別圖靈字韻

放歌用前韻

題樵野丈運甓齋話別圖

和沈子培同年會植

游仙詞仍用沈乙庵韻

元朱碧山銀槎歌

爲何翹高兵部藻翔題象山圖

酬曾重伯編修

上黃鶴樓

上岳陽樓

長沙弔賈誼宅

書憤

支離

卷九 古今體詩共一百三十六首

紀事

放歸

九月朔日啓程由上海歸舟中作

到家

感事

入境廬之鄰有屋數間余購取其地葺而新之有樓巋然獨立無壁南武山人爲書一聯曰陸沈欲借舟權住天問翻無壁受呵因足成之

寒夜獨坐臥虹榭

小飲息亭醉後作

仰天

雁

酬劉子巖同年瑛

己亥雜詩

己亥續懷人詩

臘月二十四日詔立皇嗣感賦

卷十 古今體詩共七十六首

庚子元旦

杜鵑

初聞京師義和團事感賦

寄懷邱仲闕逢甲

感事又寄邱仲闕

述聞

七月十五夜暑甚看月達曉

南漢修慧寺千佛塔歌

五禽言

再述

七月二十一日外國聯軍入犯京師

聞車駕西狩感賦

有以守社稷爲言者口號示之

中秋夜月

讀七月廿五日行在所發罪己詔書泣賦

諭勦義和團感賦

聞駐蹕太原

聞車駕又幸西安

久旱雨霽邱仲闕過訪飲入境廬仲闕有詩兼慨

近事依韻和之

再用前韻酬仲闕

三用前韻

四用前韻

五用前韻

六用前韻

七用前韻

八用前韻

天津紀亂十二首

京亂補述六首

京師

三哀詩

和平里行和邱仲闕

卷十一 古今體詩共十九首

聶將軍歌

夜起

羣公

奉 諭改於八月廿四日回鑾感賦

和議成誌感

啓鑾喜賦

車駕駐開封府

李肅毅侯挽詩四首

寄題陳氏晴廬

病中紀夢述寄梁任父

人境廬詩草目錄終

人境廬詩草卷一

嘉應黃遵憲公度

感懷

世儒誦詩書往往矜爪觜昂頭道皇古抵掌說平治上
言三代隆下言百世俟中言今日亂痛哭繼流涕摹寫
車戰圖胼胝過百紙手持井田譜畫地期一試古人豈
我欺今昔奈勢異儒生不出門勿論當世事識時貴知
今通情貴閱世卓哉千古賢獨能救時弊賈生治安策
江統徙戎議

有清膺天命仁澤二百年 聖君六七作上追堯舜賢
熙隆全盛時蓋如日中天帷闥外戚患干戈藩鎮權煽
虐奄人毒煬竈權臣奸百弊成蕩滌王道同平平邇者
盜潢池神州洿腥羶治久必一亂法弊無萬全謂由吏

情竅亦坐民殷闐當世得失林未可稽陳編儒生拾古
語謂當罪己愆庚申之役有上疏請下罪己詔者顯皇十一載憂虞慌
深淵拔擢盡豪傑力能扶危顛惟念大亂平正當補弊
偏且濡浣溪筆看取穹碑鐫

吁嗟兩楹奠聖歿微言絕戰國諸子興大道幾滅裂劫
灰出秦燔六籍半殘缺皇皇孝武詔羣言罷一切別白
定一尊萬世循軌轍遺書一萌芽衆儒互拾掇異同晰
石渠講習布綿蕪戴憑席互爭五鹿角婁折泊乎許鄭
出衰然萬人傑宋儒千載後勃窣探理窟自詡不傳學
乃剽思子孟說講道稍僻違論事頗迂闊萬頭趨科名一
意相媚悅 聖清崇四術衆賢起頡頏顧闞關初塗段
王揚大烈審意得古訓沈晦悉爬抉讀史辨亥訂禮
分袒襲上溯考據家僅增文學列儒于九流中亦祇一

竿揭矧又某氏儒塗徑各岐別均之筐篋物操此何施
設大哉聖人道百家盡囊括至德如淵騫尙未一間達
區區漢宋學烏足尊聖哲畢生事鑽仰所慮吾才竭

乙丑十一月避亂大埔三河虛

六月中興洗甲兵金陵王氣復昇平豈知困獸猶能鬪
尙有羣蛙亂跳鳴一面竟開逋寇網三邊不築受降城
細民堅壁知何益翹首同瞻大帥旌

南風不競死聲多生不逢辰可若何人盡流離呼伯叔
時方災難又干戈諸公竟以鄰爲壑一夜喧呼賊渡河
聞說牙璋師四起將軍翻用老廉頗

星斗無光夜色寒一軍驚擁將登壇爭功士聚沙中語
遇敵師從壁上觀誰敢倚公爲砥柱可憐報國只心肝
東南一局全輸卻當局翻成袖手看

七年創痛記分明無數沙蟲殉一城

己未二月賊破嘉應知州文壯烈公晟死之從

而殉者萬餘人

逐鹿狂奔成鋌走傷禽心怯又弦驚爺娘弟妹

牽衣語南北東西何處行一葉小舟三十口流離虎穴

脫餘生

拔自賊中述所聞

紅巾繫我腰綠紗裹我頭男兒重橫行阿嫂汝莫愁

朝傾百斛酒暮飽千頭羊時時賭博簷夜夜迎新娘

今日阿哥妻明日旁人可但付一馬馱何用分汝我

四更起開門月黑陰雲堆幾時踏殺羊老虎來不來

潮州行

人生亂離中所謀動乖忤一夕輒三遷蹤跡無定所自

從居三河謂是安樂土世情誰念亂百事恣凌侮交交

黃鳥啼此邦不可處一水通潮州且往潮州住是時北

風寒平江蕩柔櫓行行將近城炊煙密如縷行舟忽不
前有盜伏林莽起驚賊已來快櫓飛如雨舟人急繫舟
揮戈左右拒翻懼力不敵轉逢彼賊怒扣舷急相呼不
如任攜取流離患難來行篋無幾許但飽羣賊囊免更
遭劫虜一聲霹靂破殺賊賊遽去虎口脫餘生驚喜泣
相語回看諸弟妹僵伏尚如鼠起起呼使坐軟語相慰
撫扶牀面色灰謬言不畏懼吁嗟患難中例受一切苦
須臾達潮州急覓東道主剪紙重招魂招魂江之浦
喜聞恪靖伯左公至官軍收復嘉應賊盡滅

諸侯齊築受降城狂喜如雷墮地鳴終累吾民非敵國
嘉慶間勦辦白蓮教匪仁宗詔曰自古只聞用兵於敵國未聞用兵於吾民如蔓延日久是賊是民皆吾赤子何忍誅戮
顯皇會又從據亂轉昇平黃天當立空手書此詔普告臣下云
題壁赤子雖饑莫弄兵天下終無白頭賊中原羣盜漫

縱橫

恢恢天網四圍張羣賊空營走且僵舉國望君如望歲
將軍擒賊早擒王十年竊號留餘孽六百名城作戰場
今日平南馳露布在天靈爽慰 先皇

亂後歸家

遂有還家樂跳梁賊盡平舉家開笑口一棹出江城兒
女團圍坐風波自在行驚魂猶未定夜半莫呼兵

卽別潮州去還從蓬萊歸累人行篋少滯我客舟遲顛
倒歸來夢驚疑痛定思便還無處所已喜免流離

一炬成焦土先人此敝廬

曾王父所建築

有家真壁立無樹可

巢居小婦啼開篋羣童喜荷鋤苔花經雨長狼藉滿家

書

便免顛連苦相依此一窩窗虛添夜冷屋漏得天多豺

虎中原氣蛟螭海上波掃除勤一室此志恐銷磨

送女弟

阿爺有書來言頗傾家貲箱奩四五事莫嫌嫁衣希阿
母開篋看未看先長歎吾家本富饒頻歲遭亂離累葉
積珠翠歷劫無一遺舊時典衣庫爛漫堆人衣今日將
衣質庫主知是誰掃葉添作薪烹穀持作糜尺布尙可
縫親手自維持行行手中線離離五色絲一絲一淚痕
線短力既疲卽此區區物艱難汝所知所重功德言上
報慈母慈

中原有舊族遷徙名客人過江入八閩展轉來海濱儉
嗇唐魏風蓋猶三代民就中婦女勞尤見風俗純雞鳴
起汲水日落猶負薪盛妝始脂粉常飾唯綦巾汝我張
黃家頗亦家不貧上溯及太母劬勞無不親客民例操

作女子多苦辛送汝轉念汝恨不男兒身

阿母性慈愛愛汝如珍珠一日三摩抄未嘗離須臾今日送汝去執手勞踟躕汝姑哀寡鵠哀腸多鬱紆弟妹尙穉幼呀呀求乳雛太母持門戶人言勝丈夫靡密計米鹽辛勤種瓜壺一門多秀才各自誇巾裾粥粥擾羣雌申申詈女嬖汝須婉以順朝夕承歡娛歡娛一以承我心一以愉待汝一月圓歸來話區區

二十初度

墮地添丁日時平萬戶春我生遂多事臣壯不如人離亂艱難際窮愁現在身摩抄腰下劍龍性那能馴

游豐湖

西湖吾未到夢想或遇之濛濛水雲鄉荷花交柳枝今日見豐湖萬頃青琉璃持問老東坡杭穎誰雄雌浹旬

困積暑潑眼驚此奇恍如畫圖中又疑夢寐時人生爲
何事畢世狂奔馳黃塵沒馬頭勞勞不知疲嗟我不能
仙豈能免人羈要留一片地自謀老來私悠悠湖上雲
耿耿我所思下與鷗鷺盟上告雲天知

濃綠潑雨洗森森竹千个亭亭立荷葉萬碧含露唾四
圍垂柳枝隨風任顛簸中有屋數椽周遭不爲大羅山
峙其西豐湖繞其左關門不見山鑿穴疊石作前檐響
擺檉後屋旋水磨扶筇朝看花入夜不一坐亭午垂湘
簾倦便枕書臥偕婦說家常呼兒問書課敲門剝啄聲
時有老農過君看此屋中非他正是我行移家具來坐
待鄰里賀

斜陽照空林徘徊未忍去多戀究多累掉頭未可住我
生二十年初受塵垢汙家計竭中乾俗狀作先驅飛鳥

求枝棲三匝方繞樹大海泛浮萍歸根定何處渺茫發
大願天意肯輕付況今千里來擔簦期一遇行鎖矮屋
中蒸甑熱毒注密如營窠蜂困似涸轍鮒走雷轉腸鳴
渴水乞沫响誰能出塵世一脫束縛苦回頭望此湖萬
頃迷烟霧夢魂時一遊且記湖邊路

長子履端生

剛是花生日春風霽一廬愛防牛折齒慚詠鳳將雛急
喜先求火癡心到買書長安傳一紙歡慰定何如

雜感

少小誦詩書開卷動齟齬古文與今言曠若設疆圉竟
如置重譯象胥通蠻語父師遞流傳慣習忘其故我生
千載後語音雜僮楚今日六經在筆削出鄒魯欲讀古
人書須識古語古唐宋諸大儒紛紛作箋注每將後人

心探索到三五性天古所無器物目未睹妄言足欺人
數典既忘祖燕相說郢書越人戴章甫多歧道益亡舉
燭乃筆誤

大塊鑿混沌渾渾旋大園隸首不能算知有幾萬年義
軒造書契今始歲五千以我視後人若居二代先俗儒
好尊古日日故紙研六經字所無不敢入詩篇古人棄
糟粕見之口流涎沿習甘剽盜妄造叢罪愆黃土同搏
人今古何愚賢即今忽已古斷自何代前明窗敞流離
高爐熱香烟左陳端溪硯右列薛濤箋我手寫我口古
豈能拘牽即今流俗語我若登簡編五千年後人驚爲
古爛斑

造字鬼夜哭所以示悲憫衆生殉文字蚩蚩一何蠢可
憐古文人日夕雕肝腎儷語配華葉單詞畫蚯蚓古近

辨詩體長短成曲引洎乎制義興卷軸車連軫常恐後
人體變態猶未盡吁嗟東京後世茶文益振文勝失則
弱體竭勢已窘後有王者興張網羅賢俊決不以文章
此語吾敢信但念廢棄後巧拙同泯泯欲求覆瓿已
難拾灰燼我今展卷吟徒使後人哂

周公作禮樂謂矯世弊害秦皇焚詩書乃使民聾瞶宋
祖設書館以禮羅措大吁嗟制藝興今亦五百載世儒
習固然老死不知悔精力疲丹鉛虛榮逐冠蓋勞勞數
行中鼎鼎百年內束髮受書始卽已縛紐械英雄盡入
彀帝王心始快豈知流寇亂翻出擾鋤輩誦經賊不避
清談兵旣潰儒生用口擊國勢幾中殆從古禍患來每
在思慮外三代學校亡空使人材壞

謂開明經科所得學究耳謂開制策科亦祇策士氣謂

開詞賦科浮華益無恥持較今世文未易遽軒輕隋唐
制科後變法屢興廢同以文章名均之等廢契譬如探
籌策亦可得茂異狗曲出何經驢券書博士所用非所
習祇以叢罵詈亦有高材生各自矜爪背袒漢誇攷據
媚宋爭義理彼此互是非是非均一鄙茫茫宇宙間萬
事等兒戲作詩一長吟聊用自娛喜

哭張心谷士駒三首

匆匆事業了潮州竟認潮州作首邱哀泣一家新故鬼

此邦與汝定何讐

君之生之婚之卒暨
雙親之歿皆在潮州

半盂麥飯一鑪香終有人來拜墓堂

將爲君
立嗣

只恨錦囊

無贖稿廣陵散絕并琴亡

君歿後余搜君遺稿及
其先人稿均不可得

一隊同游少年輩兩年零落九原多頻頻淚到心頭滴

便恐明朝兩鬢皤

山歌 土俗好爲歌男女贈答頗有子夜讀曲遺意採

其能筆於書者得數首

自煮蓮羹切藕絲待郎歸來慰郎饑爲貪別處雙雙箸
只怕心中忘卻匙

人人要結後生緣儂只今生結目前一十二時不離別
郎行郎坐總隨肩

買梨莫買蜂咬梨心中有病沒人知因爲分梨故親切
誰知親切轉傷離

催人出門雞亂啼送人離別水東西挽水西流想無法
從今不養五更雞

隣家帶得書信歸書中何字儂不知等儂親口問渠去
問他比儂誰瘦肥

一家女兒做新娘十家女兒看鏡光街頭銅鼓聲聲打

打着中心只說郎

嫁郎已嫁十三年今日梳頭儂自憐
記得初來同食乳同在阿婆懷裏眠

自剪青絲打作條親手送郎將紙包
如果郎心止不住看儂結髮不開交

第一香櫟第二蓮第三檳榔个个圓
第四夫容五棗子送郎都要得郎憐

生女

拜佛拈花後居然見汝生繫絲誰健婦
爭乳奈雛兄覓果年來事游山嫁畢情一齊到心坎
杯酒醉還傾

庚午六月重到豐湖誌感

湖光潏潏柳陰陰又作隄邊叉手吟
客與名山同惜別人逢舊雨漸交深
何時葛令移家住猶是菟裘養老心

自揀黃柑親手種他年看汝綠成林

游潘園感賦

神山左股割蓬萊惘惘游仙夢一回海水已乾田亦賣
主人久易我纔來棲梁燕子巢林去對鏡荷花向壁開
彈指須臾千載後幾人起滅好樓臺

香港感懷十首

彈指樓臺現飛來何處峯爲誰刈藜藿遍地出芙蓉
以片肇禍開港後進口益多方丈三神地諸侯百里封居然成重鎮高

壘矗狼烽

豈欲珠崖棄其如城下盟帆檣通萬國壁壘逼三城虎
穴人雄據鴻溝界未明
割地以後每以海界爭論傳聞哀痛詔猶灑

淚縱橫

宣廟遺詔深以棄香港爲取

酋長虬髯客豪商碧眼胡金輪銘武后
香港城名域多利卽女主名也

寶塔禮耶蘇火樹銀花耀氎衣繡縷鋪五丁開鑿後欲
界亦仙都

盜喜逋逃藪兵誇曳落河官尊大呼藥

官之尊者亦稱總督

客聚

衆婁羅王面鐫金寶蠻腰跨革鞞斑闌衣服異關吏莫

誰何

港不設關

沸地笙歌海排山酒肉林連環屯萬室

地勢如環故名上中下三環

尺土過千金民氣多羶行夷言學鳥音黃標千萬積翻

訝屋沈沈

便積金如斗能從聚窟消蠻雲迷寶髻脂夜蕩花妖龍

女爭盤鏡鮫人鬪織綃珠簾春十里難遣可憐宵

博物張華志千間廣廈開摩抄銅狄在悵望寶山回大

鳥如人立長鯨跋浪來官山還府海人力信雄哉

流水游龍外平波又畫撓佛猶誇國樂奴亦挾天驕御

氣毬千尺馳風馬百驍街頭巡赤棒獨少市聲囂

指北黃龍飲從西天馬來飛輪齊鼓浪祝嘏日鳴雷凡

國軍艦初至必然嘏二十一中外通喉舌橫縱積貨財他

登高遙望海大地故恢恢

遣使初求地 高皇全盛時乾隆四十八年英遣使馬
廿尼來朝卽以乞地爲言

六州誰鑄錯一慟失燕脂鑿空蠶叢闢噓雲蜃氣奇山

頭風獵獵猶自誤龍旗

寓汕頭旅館感懷寄梁詩五 居實

策策秋聲木葉乾百端蕭瑟入心肝顛風斷渡鈴能語

古月懸天鏡獨看未到中年哀樂備無多同調別離難

巡簷繞室行千徧剛對孤燈又倚闌

將至潮州又寄詩五

片帆遙指鳳凰城屈指家山尙幾程以我風塵憔悴色

共君骨肉別離情一燈縮縮棲鴉影四壘蕭蕭戰馬聲

回首六年離亂事夢餘猶覺客心驚

乙丑冬月避亂居潮州寇退乃返

鐵漢樓歌

溼雲漠漠山有無登城四望遙踟躕垣敗瓦不可踏
劫灰昏黑堆城隅剜苔剔蘚覓碑讀字缺半亦形模糊
公無遺像有精氣恍惚左右神風趨憶公秉政宣仁日
自許稷契君唐虞英名卓卓驚殿虎辣手赫赫鋤城狐
同文獄起事一變先生遂爾南馳驅洞庭寒夜走蛟蜃
瀟湘清晝帝猩廳臣心萬折必東去一生九死長征途
豈知章蔡恨未雪謂臣雖死猶餘辜如飛判使暗挾刃
來取逐客寒頭顱海州太守亦義士告語先生聲嗚嗚
先生湛然色不變崛起強故態猶狂奴有朋誣諉細料理
對客酣飲仍歌呼嗚呼先生真鐵漢品題不愧眉山蘇

一樓高插北城角中有七尺先生軀鐵石心腸永不變
騰騰劍氣光湛盧荔丹蕉黃並羅列無有遠邇羣南膜
軍書忽報寇氛熾官民空巷爭逃遁先生獨坐北樓北
雙眼炯炯張虬鬚跳梁小鼠敢肆惡公然裂毀無完膚
邇來彫瘵漸蘇息無人收拾前規模東坡已往仲謀死
起人忠義誰匡扶金狄摩挲事如昨鉛水清淚流已枯
我來憑弔空惻愴呀呀屋上啼寒烏

和周朗山琨見贈之作

噫嘻乎儒生讀書不識羞動誇虎頭燕領徑取萬戶侯
萬戶侯耳豈足道烏知今日稗瀛大海還有大九州賤
子生長南方陬少年寂寂車前騶當時乳虎氣食牛衆
作蟬噪嗤噍啁小技蟲雕羞刻鏤中間離亂逢百憂紅
塵蔽天森戈矛我時上馬看吳鉤嗚呼不能用吾謀駒

伏轅下鷹在韝看人貂蟬出兜鍪幡然一笑先生休矢
人爲矢輈人輈蘭臺漆書吾箕裘且呼古人相綢繆打
頭屋小歌聲道亦手帖括吟呶嘍時文國小原莒鄒要
知假道途必由習爲諧媚爲便柔招搖過市希急售盜
竊名器爲奸偷平生所恥羞效尤謗傷爭來撼樹蜉非
笑亦有槍榆鳩立志不肯隨沈浮一齊足敵衆楚咻皇
皇使者來軒輶元珠出水黝然幽珊瑚入網枝相膠不
才如憲亦兼收一頭放出千人稠其旁一客爲馬周炯
炯秋水橫雙眸謂生此文無匹速卽此已卜公侯仇噫
嘻吾文原啞嘔公竟許我海與邱感公知己淚一流以
公才氣命不猶文不璜珮鳴琅璆武不龍虎張旌旂時
時酒酣摩劓緱蕭條此意將白頭至今不願爲閒鷗乘
風猶來海上游海波正寒風颼颼中有蝮蛇從鶻鷲盲

雲怪雨無停留老蛟欲泣潛魚憂何物小魅不匿度公
然與龍爲仇讐蒼梧回首雲正愁公從仙人來十洲公
其爲龍求蟠虬左揖洪崖右浮邱招邀羣策同力勦號
召百族相聚謀鐵鎖重使支祈囚赤文綠字光油油重
銘瑤宮修瓊樓嗚呼此願何時酬

寄和周朗山

拍手引鸞鳳來從海上游大鵬遇希有兩鳥忽相酬金
作同心結刀期繞指柔各平湖海氣商榷共登樓

春夜懷蕭蘭谷

光泰

深巷會無車馬喧閉關我自枕書眠平生放眼無餘子
與汝論交過十年既覺夢都隨雨去半開花欲放春顛
隔牆紅徧千株樹何日能來看木棉

聞詩五婦病甚

中年兒女更情長宛轉重吟婦病行終日菜羹魚醬外
帖書乞米藥鈔方

懷詩五

萬族求饒益營營各一途俗情日紛擾吾道便愁孤波
靜魚依藻枝高鳳在梧昨書言過我翻又費招呼

爲詩五悼亡作

畫閣垂簾別樣深回廊響屣更無音平生愛爾風雲氣
倘旣消磨不自禁

庚午中秋夜始識羅少珊文仲於矮屋中遂偕詩五共
登明遠樓看月少珊有詩作此追和時癸酉孟秋也
萬蠶食葉蠶聲酣三條紅燭光炎炎忽然大聲出鄰屋
偷窺有客掀襪衫狂吟高歌徹屋瓦兩目虎視方眈眈
此人豈容交臂失闖然握手驚雄談問名識是將家子

金版玉匱素所諳是時發策問兵事胸中武庫胥包舍
我方掀簾促膝坐昂頭有月來屋檐此人此月此樓豈
可負此夕輒邀吾友同追探巍巍明遠樓高插南斗南
鉦聲鼓聲宵戒嚴我來不避官吏嫌躡衣徑上梯百尺
憑欄要到塔七尖天風吹衣怕飛去汝我左右相扶攬
纖雲四捲天不夜空中高懸圓明蟾沈沈矮屋萬行瓦
昨者煮海今堆鹽回頭卻望望東海濛濛烟氣團蔚藍
其餘人家億萬戶水波不動澄空潭三更夜深風露重
下土萬蟻齊黑酣大千世界共此月今夕只照人兩三
雖然無肴無酒不得謀一醉猶有驚人好句同掀髯別
來此月幾圓缺三人兩地同觀瞻匆匆三年忽已過秋
風重磨舊劍鐔羊城相見執手笑追述往事言呢喃男
兒竟作可憐蟲等此蓄縮纏窠蠶少珊少珊我且與汝

共登越王之高臺白雲往來駕兩驂試尋黃屋左蠶舊
霸業陰符發篋溫韜鈐不然泛舟南海南乘風破浪張
長帆要借五十牂餌釣此巨鰲去剗腹鬻肉供口饒使
君於此自不凡何苦徒作風月談要搏扶搖羊角直上
九萬里埋頭破屋心非甘噫嘻乎埋頭破屋心非甘
羊城感賦六首

早潮晚汐打城門玉漏聲催銅鼓喧百貨均輸成劇邑
五方風氣異中原舵舟輿轎山川險帕首鞞刀府帥尊
今古茫茫共誰語越王臺下正黃昏

手挽三江盡北流寇氛難洗越人羞黃巢毒竟流天下
陶侃軍難進石頭金陵未克以前左帥致書曾文正公謂當從廣東進師文正不謂然左帥
又言於此始者於此終粵賊當滅於粵後其言竟驗鋌鹿偶然完首尾爛羊多賴
得公侯攬槍掃盡紅羊換從此當朝息內憂

際海邊疆萬里開，臣佗大長信奇才。
平蠻看豎擎天柱，朝漢同登浴日臺。
南極星辰原北拱，東流海水竟西回。
喁喁鸛鵲波濤阻，獨有聯翩天馬來。

慷慨爭揮壯士戈，洗兵竟欲挽天河。
苦煩父老通邛笮，難禁奸民教尉佗。
祆廟火焚氛更惡，鮫人珠盡淚猶多。
紛紛和戰都非策，聚鐵雖堅奈錯何。

戰臺祠廟巋然存，雙闕嵯峨聳虎門。
誰似伏波饒將略，猶聞蹈海報君恩。
要荒又議珠崖棄，霸業彌思蠹屋尊。
最是凋零蘇武節，無人海外賦招魂。

木棉花落絮飛初，歌舞岡前夜雨餘。
閣道鸞聲都寂寞，市樓蜃氣亦空虛。
騎羊漫詔仙人鶴，驅鱷難除海大魚。
獨有十三行外柳，重重深護畫樓居。

人境廬詩草卷一終

民國十九年六月
長孫能立重校印

人境廬詩草卷二

嘉應黃遵憲公度

寄四弟

雛雁毛羽成各各南北飛與君爲兄弟義兼友與師師
嚴或傷和肝鬲君所知階前百尺桐濃綠侵鬚眉樹根
兩坐石一平一嶽奇我坐拾落葉君立攀高枝此讀彼
吟哦形影常相隨有時隔屋語亦復穴壁窺當時忘此
樂亦已樂不疲人生歡聚時何知苦別離

匏瓜繫不食壯夫是所羞出門望長安遠在天盡頭貢
士親署名行作萬里游念此當乖離恩情日綢繆今年
槐花黃掛帆來廣州亦謂此恨淺待我過深秋秋風亦
已過別恨終悠悠欲歸不得歸飄蓬迹沈浮登高插茱
萸重陽風颼颼以汝異鄉思知我游子憂千里遠相隔

已恨歸滯留何況萬里別益以十年愁

人境廬雜詩

春風吹庭樹樹樹若爲秋忽作通宵雨來登近水樓溼
雲攢岫出疊浪拍天流不識新波長沙邊有睡鷗

門前幾株樹樹外一亭茅啞絮魚行水銜雛鳥戀巢月
隨瓜架漏花入藥欄交難怪陶徵士移居樂近郊

亦有終焉志其如綠鬢何雲閒猶作雨水止亦生波春
煖先鴉起湖寬讓鮒多門前親種柳生意未婆娑

出屋梧桐長都經手自栽十年勞樹木百尺看成材莽
莽風雲會深深雨露培最高枝上月留待鳳凰來

紫藤花壓架開落到如今舊雨傷黃土殘春悵綠陰尋
香猶惘惘埋玉故深深庭下閒叉手多余戀舊心

葉葉蕉相擊叢叢竹自鳴蕭蕭傳雨意撼撼誤秋聲露

溼寒蛩寂枝搖暗鵲驚幢幢燈影暗獨坐到微明

初日照高樓遲遲樹影收苔痕綠壁漫花氣到簾留春

軟雞同粥風和鵲亦柔書聲牆外過有弟住東頭

耐冷齋頭客

西甯學署齋名時詩五客此

鰥魚不寐餘知君長獨坐

念我近何如哀樂中年感艱難遠道書楊梁諸子好蹤

跡亦蕭疏

將應廷試感懷

二十餘年付轉車自摩髀肉問何如暫垂鵠翼扶搖勢

一學蠅頭世俗書蕩蕩天門爭欲上茫茫人海豈難居

尋常米價無須問要訪奇才到狗屠

出門

出門楊柳萬條春送我臨歧意未申得失雞蟲何足道

文章牛斗可能神無窮離合悲歡事從此東西南北人

手版脚鞞兼帕首任風吹墮軟紅塵

由輪舟抵天津作

遙指天河問析津茫茫巨浸浩無垠華夷萬國無分土
人鬼浮生共轉輪敵國同舟今日事太倉稊米自家身
大鵬擊水南風勁忽地吹人落軟塵

水濱

來牛去馬看頻頻獨立蒼茫此水濱避面青山難見我
打頭黃土信搏人東西市舶無分界南北藩封此要津
七十二沽秋色滿不堪吹鬢半胡塵

武清道中作

始識風塵苦吾生第一回斗星隨北指雲氣挾東來走
竟偕牛馬臣初出草萊海天千萬里南望幾徘徊
天到荒寒地山猶懶刻鏤沙濛惟見日樹瘦盡如秋長

路漫漫苦斜陽渺渺愁嶺南好時節不爲荔支留

綠樹如雲擁門前百尺桐吾家正溪北有弟住牆東盡
室團樂樂行人夢寐中茫茫百端集到此意何窮

唐魏風同儉幽并氣不豪龍衣將瓦覆牛矢壓牆高憂
患家多口荒涼地不毛最憐羅馬拜中婦乞錢號

居者與行者勞勞同一嘆 天恩纔咫尺民氣不衣冠
地況窮荒遠人兼瑣尾殘監門圖一幅誰上 九重看

早行

堤長已歷八九折折擊猶聞四五更涼風吹衣抱衾臥
殘月在樹啼鳥聲東方欲明未明色北斗三點兩點星
腐儒饑寒苦相迫驅車自唱行行行

慷慨

慷慨悲歌士相傳燕趙多我來仍失志走問近如何到

處尋屠狗初番見橐駝龍泉腰下劍一看一摩挲

月夜

梧桐庭院鳳凰枝六尺湘簾踈地垂長記綺窗相對語
二三更後夜涼時

代東寄詩五蘭谷並問諸友

入夢江湖遠撐胸天地寬長安人踏破有客獨居難短
榻鳴蟲寂孤燈落葉寒不禁兒女語瑣屑寫君看

萬樹秋風起吾心吹不歸袖留孤刺在書自百城圍大
海容鷗住高雲看鳥飛酒痕和淚漬時一檢青衣

親健都奇福芳蘭各自花雲扶王父杖余租年十六矣六酒煖

冷官衙

詩五尊人官西甯學博

巢燕長依母棲烏又有家

詩五近方續娶

上堂如照鏡莫嘆鬢絲華

覆地桐陰綠中爲人境廬剛柔分日課兄弟各頭居草

草常留飯匆匆亦讀書近來仍過我見我袞師無

狂歌示胡二曉岑 曠

飛鳥不若狡鳳游鱗不若豢龍虛譽不若疑謗速拙不
若緩工高臺落日多悲風我劍子劍弓子弓與子拍手
青雲中但須塞耳甘耳聾蒼蠅營營無萬數下士大笑
聲滄滄

重九日雨獨遊醉中作

吹面風多冷意酣蕭蕭寒雨滴重簷宵來一醉長安市
竟夕相思大海南徧插茱萸偏我少無端萍梗爲誰淹
故山歲歲登高去蟹熟鱸香酒壓擔

別賴雲芝同年 鶴年

結客須結少年場占土能占男子祥爲雲爲龍將翱翔
擔簦跨馬毋相忘蒼梧之水悠且長中有潯山山蒼蒼

前有龍翰臣呂月滄后朱伯韓王定甫靈芝繼起殊尋
常渾金璞玉其器良皇皇使者鐵網張摩抄三之貢玉
堂鳳凰飛飛上高岡立足未穩天風剛吹爾斂翼下入
荒長安紈袴多清狂闊眉廣袖時世粧日醉杜曲歌章
娘紅裙翠襦圍銀觴朝朝暮暮樂未央子獨閉門尋義
皇青鞋破帽闇無光時或彳亍書買坊邂逅揖我謂我
臧子之外家吾故鄉通明移家趨華陽至今鄉音猶未
忘西風牽手情話長比鄰胡二工文章因我識子據肝
腸桃笙棋褥鋪繩床敲冰煮茗焚清香左陳鐘鼎右縹
緗往往道古稱先王繁星窺戶月在牆甲夜至丙言尤
詳子言少孤早罹殃機聲燈影宵啼蜚阿母責讀聲琅
琅每至蓼莪泣數行去年雛鳳新求凰左敖右翻招由
房和鳴鏘鏘期育姜倚門倚閭久相望不可以留行束

裝春明門外多垂楊寒雨乍斷露始霜今日送子天一
方貧士縮瑟無酒漿祇用好語深淺商子足暫別庸何
傷歸與兄弟謀稻梁問字之酒束脩羊男唯女俞懽重
堂明年槐黃舉子忙呦呦鹿鳴諧笙簧行聽子歌承筐
將人生相見殊參商吁嗟努力毋怠皇

爲蕭少尉步青作

蕭公平遠人任河南永城縣丞成

豐五年粵逆破城妻女姪婦同時殉難分祀昭忠節

烈祠

守土穹官先敗北防河諸將亦籠東
一死猶能作鬼雄
哦松射鴨閒官耳

烏之珠歌

毅皇帝馬領侍衛某所進西安將軍所購也官車晏
駕馬悲鳴於景山林樹之間卒以不食斃微臣聞而

感焉

北風雨雪門不開景山暫作金粟堆黃竹歌停八駿杳
一馬鳴訴悲風哀此馬遠自流沙至鐵花滿身黑雲被
將軍甫奏天馬來雄姿已有凌雲意鳳臆麟身人未知
內官頻促黃門試天顏一顧喜出羣便入天閑登上駟
春郊三月楊柳絲九衢夾道飛龍旗臥瓜吾仗引金鉞
霓幢羽葆隨黃麾烏皮靴聲地橐橐龍紋蓋影雲遲遲
十五善射作前導親王貝勒相追隨中一天人御飛鞚
躡電追風塵不動黃鞵朱氎鍍金鞍顧影不鳴更矜寵
路旁遙指衣黃人側睨龍媒神亦悚沙平風軟四蹄輕
不聞人聲惟馬聲銀花佩粉露黃帶紅絨結頂飄朱纓
少年天子萬民看望塵不及人皆驚鑾儀校尉獨惆悵
輕車步輦空隨行從官爭費千金產苦索飛龍求上選

奚官善相阿敦調有此神駿無此穩一朝忽泣天花雨
日慘雲冥愁楚楚都是攀髯不逮人并鮮慰情勝無女
萬花淚濺柳愁含御牀不埽空垂簾六宮共抱蒼梧痛
萬國還驚白奈簪多時不見宮中駕一馬悲嘶夜復夜
自蒙拂拭衆人驚奚啻黃金長聲價青絲絡頭伏道旁
反因受寵叢譏罵何如死殉侍昭陵風雨靈旗馳石馬
先皇御宇十三年金牀玉几少晏眠黃巾甫平白帽擾
戰馬每歲從周旋望雕禮拜木蘭返十年往事猶目前
中興未集弓劍闕豈獨此馬哀呼天卽今兵革猶未息
羣胡化鬼擾西域王師出關萬虎羆衆馬從人同殺賊
汝獨一死報君恩吁嗟龍性固難測烏珠烏珠努力肯
飽食諒汝立功能報國

田橫島

生王頭死士壘一毛輕等邱山重臣頭百里走見王王
自趨前頭不動五百人頭共一邱人人視頭同贅疣背
面事讎頭亦羞橫來橫來大者王小者侯臣戴頭來王
勿憂嗚呼死士壘乃爲生王頭

和鍾西耘庶常德祥津門感懷詩

雷動星馳入貢車舌人環列護交閭但占風雨都來享

偶斷苞茅便問諸宅北曾分義仲命

康熙中用湯若望南懷仁爲欽天監

皆西人綏南遠賜趙佗書

康熙二十五年

俄羅斯邊鄙之

使舶賜其國王書乃遣使

盟津八百爭朝會猶記徵祥

紀白魚

八荒無事息兵車七葉謳吟洽里閭豈謂浮雲變蒼狗
竟教明月蝕詹諸驪山烽火成焦土牛耳牲盤捧載書
秋草木蘭馳道靜白龍微服記爲魚

六月中興賦出車金陵王氣復充間華夷共主皆思服
堯舜如天尙病諸盪寇重編歸漢里和戎難下絕秦書
只應文物開王會珥筆會誇太史魚

狼臙遺種等高車萬族相從到尾間魑魅入林逢不若
蝦蟆吞月鑑方諸昔聞鞞鞞歌西樂今見佉盧制左書
始受一塵濠鏡地有明師早漏多魚

執挺降王走傳車先擒月愛後東間難言赤狄初何種
終痛庭堅祀忽諸兩帝東西爭戰國九州大小混方書

喁喁鵜鵜來無路久已縱橫海大魚

謂南洋各島

電掣重輪走水車風行千里獻比閭移山未要嗤愚叟
捧土眞能塞孟諸黑齒雕題徵鬼錄赤文綠字詡天書
尋常弓矢疑堪用聞道潮人驅鱷魚

鸞聲閣道碾安車元老相從語跨間未雨綢繆徹桑土

御冬旨蓄備桃諸借籌幸闢同文館警鼓驚傳奔命書
相戒魴鱧休出入吞聲私泣過河魚

東西南北走舟車虎穴驚看插邑間七萬里戎來集此
五千年史未聞諸考工述物搜奇字鬼谷尊師發秘書
教訓十年民力盛尙排犀手射鯨魚

福州大水行同張樵野丈蔭桓龔靄人文易圖作

黑風吹海海夜立倏忽平地生波濤囊沙擁水門急閉
飛浪已越城牆高漂廬拔木無萬數安得江捷淮陽包
衆頭攢動乍出沒欲葬無棹棲無巢攀嵯緣壁幸脫死
饑腸雷吼鳴嗷嗷中丞視民猶己溺急起冒突揮露撓
鳴鴉毀室商救子魚鼈滿城資渡橋况聞移粟蘇喘息
自雍及絳來千艘流離瑣尾得安宅無復登屋聲三號
天災流行國代有難得官長勞民勞海疆東南正多事

水從西來紛童謠曲突徙薪廣恩澤願亟靖海安天驕
將應順天試仍用前韻呈藹人樵野文

平生攬轡澄清志足跡殊難出里閭萬一鉛刀堪小試
可容韞匱便藏諸觚稜魏闕宵來夢簡練陰符夜半書
一第區區何足道頗番緣木妄求魚

轍亂旗翻屢敗車行吟憔悴比三閭未知吾舌猶存否
終望臣饑得食諸辛苦低頭就羈勒功名借徑寄詩書
若論稽古榮車服久已臨淵不羨魚

旁午軍書議出車沿邊鵝鶴列爲閭眼看虎落環甌脫
心冀燕雝雪望諸四海同袍征士氣頻年贈策故人書
荷戈亦是男兒事何必河魴始食魚

齊東燕北走舟車三載南雲望倚閭宦學無成便歸去
父兄有命敢行諸傷禽惡聽連環彈老蠹愁繙舊校書

碧海掣鯨公手筆倘分勺水活枯魚

述懷再呈藹人樵野丈

嗚呼制藝興今蓋六百年宋元始萌葉明制 皇朝沿
十八房一行羣蟻趨附羶諸書束高閣所習唯兔園古
今昏不知各各張空拳士夫一息氣奄奄殊可憐黼黻
承平時無賢幸無奸小醜一竊發外患紛鉤連但辦口
擊賊天下同拘攣 祖宗養士恩幾費大官錢徒積汗
牛文焉用扶危顛到此法不變終難興英賢中興名世
者豈不出其間

漢家耀武功累葉在西北車書四萬里候尉三重譯物
腐蟲蠹生月盈詹諸蝕鼠盜忽竊發犬戎敢相逼惜哉
臣年少不及出報國中興六月師羣陰歸殄滅臣虎臣
方叔持節布威德如何他人睡猶鼾臥榻側白氣十丈

長狼星影未匿羣狐舞天山首者阿古柏公與秦晉盟
隱若樹一敵王師昨出關軍容黑如墨狺狺桀犬吠尙
遲有苗格東南鬼侯來晝伏夜伺隙含沙射人影鬼蜮
不可測虎威狐輒假鴟視鼠每嚇今年問周鼎明年索
趙璧恫疑與虛喝悉索無不力蕩蕩王道平如行入荆
棘普天同王臣咸願修矛戟荷戈當一兵吾亦從殺賊
兩漢舉賢良六朝貴門第設科不分目我 清重進士
孔孟生今日必就有司試豈能無斧柯皇皇行仁義憲
也少年時謂芥拾青紫五嶽填心胸往往矜爪觜三戰
復三北馬齒加長矣破劍短後衣年年來侮恥下爭雞
鷺食擔囊走千里時時發狂疾痛灑憂天淚羣書雜然
陳所志非所事枘鑿殊方圓如何可嘗試今 上元二
年詔書下黃紙 帝曰爾諸生爾其應大比紛紛白袍

集臣亦出載贄既不莘野耕又難漆雕仕龍門雖則高
舍此何位置掄才國所重得第親亦喜繞牀夜起舞何
以爲臣子

大獄四首

國取誠難雪何讎到匹夫既傳通道檄翻棄入關縲事
竟成狙擊危同捋虎鬚陰謀圖一逞攘外計何愚

萬里滇南道空勞秉節臣就令戎伐使已累漢和親况
坐王庭獄惟誣化外人在旁鷹眼睨按劍更生嗔

洗血拚流血鯨魚海上橫人方投袂起我始奉書行重
鎮勞移節羣兒慮劫盟懷柔數行詔悔過復渝平

休倡攘夷論東西共一家疏防司里館謝罪使臣槎詎
我持英蕩容人擊副車萬方今一概莫自大中華

別張簡唐思敬並示陳絳尙元焯